

“এর আগে যত বার আসিয়াছি ধরণীর কোড়ে—

আজিকার আগে আমি জন্মেছিলাম কাহাদের হয়ে,
কেবা ছিল পিতা মোর, কিবা নাম, কিবা পরিচয়ে ?
এই শ্যামা মৃত্তিকাতে, সুমধুর সবুজ প্রান্তরে ?
অথবা লোহিত, তপ্ত, কঙ্করিত বালুকার চরে ?
অথবা জন্মিয়াছিলাম সূর্য্যহীন ‘অরোরা’র দেশে,
তুঘারে করিয়া ঘর, ‘শিল’ চুঁরি ছিলাম সিন্ধুঘেঁসে !
অথবা অচল মোরে এক জন্ম দি’ছিল আশ্রয়,
পাহাড়ীয়াদের মাঝে, ঝর্ণাতীরে জন্মের বিষ্ময়
উপল শয্যার কোলে পেয়েছিলাম ; হ’ল তারা শেষ,
সে সব জন্মের স্মৃতি আজো মোর হয় নি নিঃশেষ ।
সবুজ লোহিত শ্বেতে জন্মে জন্মে মন ভুলাইল ;
উত্তরাধিকার-সূত্রে জন্মান্তের আমারে বাঁধিল !
কেমনে ঠেলিব তায়, রক্ত-কণা ওঠে উতলিয়া,
মরুমের সিন্ধুমায়া ডাকে মোরে হাতছানি দিয়া ।
আমি কি জন্মিয়াছিলাম ওই দূর নীল চন্দ্রালোকে ?
সে দেশের পরিজন আজো কি কাঁদিছে মোর শোকে ?
প্রশান্ত সাগর পথে কোন্ দ্বীপে পড়েছিলাম ঘুরে,
সে জন্ম কাটিল শুধু শুনি সিন্ধু লহরীর সুরে ।
বৃক্ষের অন্তর কথা মর্ম্মরিয়া বাজিয়া যাইত
সুন্দর দ্বীপ ; উর্ষি শুধু ঐক্যতানে মর্ম্মরি ফিরিত ।

সন্ধার রহস্য হতে উষার রহস্য-মেথলায়
 নিঃসঙ্গ দ্বীপের সাথে মোর মন মাতিত খেলায়
 কল্পনায় ভাসি আসে সার্থবাহ, উষ্ট্র সারি সারি
 চলিছে মধ্যাহ্ন পথে, মরুজালা ক্রমে হ'ল ভারি।
 বালুকাসমুদ্র তাতি গাঢ় লালে সন্মুখে জ্বলিছে,
 চিরিয়া মরুর বক্ষ ওঠে শিখা, পথিক চলিছে।
 হেন মনে লয় 'আজি', মোর বাড়ী ছিল ওইখানে,
 খজুর কুঞ্জতে ঘেরা ছায়ান্নিক ওই মরুতানে।
 উত্তপ্ত মরুর পানে চেয়ে চেয়ে চক্ষে হ'ত জ্বালা
 নিস্পন্দ প্রকৃতি বৃকে বেজে যেত অট্টহাস্য মালা।
 কাঁপিয়া উঠিত দেহ শয্যায় খজুর বৃক্ষ তলে,
 মরণ-প্রহর সম স্তব্ধতায় দিন যেত চলে।
 মরুচারী স্বদেশী কি? এক্সিমোরা আত্মীয় কি মোর?
 আফ্রিকার জঙ্গলে কি ছিনু আমি কাফ্রি-সহোদর?
 বুঝিতে না পারি কিছু কোন্ মাটি আমারে টানিছে,
 জন্মান্তের যোগ সূত্র কার সাথে বাঁধিয়া আনিছে?
 সংশয়গুণ্ঠন ছিঁড়ি আজি এই স্পষ্ট দিবালোকে
 দুর্নিবার আকর্ষণে শিরা মাঝে শোণিত পুলকে।
 এর আগে যত বার আসিয়াছি ধরণীর ক্রোড়ে,
 আজিকে সবার স্মৃতি টানিয়া লইয়া যাবে মোরে।

শ্রীপ্রমথনাথ গঙ্গোপাধ্যায়।

(প্রথম বার্ষিক শ্রেণী, সাহিত্য-বিভাগ)।